

ному царю Батыю з дары и велением, чтоб не воевал Резанской земли. И безбожной царь Батый, льстив есть, немилостив, принял дары и глаголя, что отнюдь не хоща воевати Резанские земли, а ярьсь и похвалясь воевать Резанские земли, и Рускую землю, и инья грады. И нача князей резанских потешати, и нача у них жен просити, и сестр, и дочарей на ложю себе. Некий от велмож резанских, научен бысть бесовскому умышлению сказа,^а безбожному царю Батыю, яко благоверны князь Феодор Юрьевич имеет кнеиню царьскова роду и лепа телом, и красна. Безбожны же царь Батый неверии своем и рече князю Феодору Юрьвичю: „дай ми жену свою видети, красоту“. Благоверный же князь Феодор Юрьевич посмеялся: „Не подобает нам христианом тебе нечестивому царю жены своя давати на блуд. Аще ли нас одолееши, — владети на блуд начнеши“. Безбожны же царю Батый зверообразным своим разярился и вскоре повеле убити благовернаго князя Феодора Юрьевича Резанскаго, а тело его повеле зверям и птицам на ростерзание. Иных князей повеле убити ж всех, а князя Феодора дятку единого отпусти — именем Апалица. Апалица^б же тайно приде вскоре тело блаженнаго князя Феодора Юрьевича и зря на тело ево плачущесе, виде его никимь не брегома, и сохраних тело его в землю. И поиде скоро к благоверные книиине Еупраксее, и сказа ей, яко благоверный князь убиен бысть от безбожнаго царя Батия. Благоверная же книииня, стоя в превысоком своем тереме, и держала она прелюбезнаго своего чада Ивана Феодоровича. И услыша такие и смертоносныя глаголы, и абие кинулась она ис превысокова своево терема и с сыном своим со князем Иваном на землю, и розбися до смерти. И принесоша тело благоверныя книиини Еупраксеи и сына ея князя Ивана Феодоровича, и похраниша чесно у великаго Николы. И от сея винныя да зовется великий Николай Зароский, яко благоверная книииня Епраксея с сыном своим со князем сама зарозися ис превысокова своево терема, о сырую землю разбися до смерти. И услыша благоверный князь Юрья Иньгоревич Резанский убиении возлюбленнаго сына своего князя Феодора Юрьевича и иных князей, нарочитых людей, от безбожнаго царя Батия и нача плакати с великою кнеинею. И собра отроков плакася весь град на мног час. И едва умолкоша от великих плачь и рыдания и въздыхания, и посла великий князь Юрья Иньгоревич во град Владимир к великому князю Егорью Всеволодовичу Владимирскому, прося у него помощи на безбожнаго царя Батия. Или он сам князь Егорий Всеволодович Владимирский сам не пошел, а помощи не дал и не послал, хотя от себя сотворити сам со царем Батыевым. И князь Юрья Иньгоревич Резанский з братом своим учредиша полки своя, и вздеваше руже на небо со слезами и рече: „Изми мя, боже, от встающих на мя, избави ны от-ворящих беззаконие. Буди путь, и тма, и ползок. Не попусти, господи, окоянных, и нескверных

^а Пропущено: сказа.

^б Пропущено: Апалица.